

四庫全書

集部

欽定四庫全書

集部

空同集卷十三至五

詳校官監察御史<sub>臣</sub>龔驥文

中書<sub>臣</sub>劉源溥覆勘

總校官進士<sub>臣</sub>繆琪

校對官中書<sub>臣</sub>袁文邵

謄錄監生<sub>臣</sub>李傳燮

欽定四庫全書

空同集卷十三

明 李夢陽 撰

五言古

渡漢

好游良有殫今朝竟言歸  
汨汨舟下濤亂之將疇依異  
途各為趨同木相隨飛遁觀  
千仞禽誰復瞻其輝

其二

萬事雖貴豫數極誰竟猷  
鵠來彈我劍且復三河游  
迤

東望濠梁嘅言懷莊周黃鳥孰興篇粉榆迺見尤

其三

於心懷佳山背之每自顧相逢鮮久要那得不念故塞  
翁罔憂馬馬歸人始悟遊女非召南千年沒貞素

其四

霖雨濡我軌寒潦何滔滔墳畝暖徒悲漢流怒洪濤思  
美歎晨夕欲濟難容舸限隔豈固逖踟蹰為誰忉

其五

閑登古樊城回望峴首山  
鸛雀躍寒蓬疇念朱岑翰  
小人競錐刀羊子廼探環  
智愚固生性融晦靡我歎

余懷百門山水尚矣頗有移家之志交春氣熙

忻馬獨往述情遣抱四詠遂成示同好數子

魯連蹈東海介子逃西山  
方舟信超越巖徑安可攀  
揚烈猶靡懲置金徒嗟歎  
伊余秉拙訥薄遊及茲年  
急湍有奔桴迫路無停轅  
慘慘滄流月悽悽沙塞煙  
徒欽靜者意未遂同袍言  
偶耕慕龐公巖棲景焦先  
捫衷諒有

持顧已竟誰諉復來感方寂解作憂更牽抑心二十載  
始別金門還積疴謝人徒頗與踈遜便眷茲丘園榮豈  
羨長苗篇

其二

浮海傷固窮逾河歎誠邁濯纓萬里流高視九州外功  
成奔運徂氣至流飈代淒淒秋柯零冉冉春條媚周覽  
倦河壖孤悰冀巖瀨道以沉寂超賞與崇深會豈惟超  
遠情亦因謝塵籟聿想山中人風吹女蘿帶折麻凌險

岵采秀越森蒼眷彌志終申獨往竟誰礙  
亭亭太行峯  
崑崙百門對抗手別故權乘雲弄煙瀝

其三

閱圖訪名奇久欽蘇門山危峯羅縣牖積石噴鳴泉  
情吟激衛女嘉遯招古賢出遊結夢想神往理誰詮  
連巖旣鬱紆迴渚復繚芊猿吟曙霏豁鴈泊暝陰還杖策躡  
丰茸解裾濯潺湲仰視遊雲翮俯察戲藻鮮覽物慨幽  
存撫化懷冥筌况逢春華交更此眺孤烟畢婚非達生

一嘯復何言

其四

山客戒明發朋故來攀留巖潭窈叵測險徑增離憂曰  
余負幽僻誦古歆遠遊陟懷康樂屐浮羨鴟夷舟探討  
傾子長浪迹多阮侯若人不可作瑤草竟何酬事往悲  
易深情存道難侔以此激孤詠喟焉睇滄洲安波有覆  
艫坦路無全輶危虞豈在嶽薄劣終見尤願附綠蘿緣  
永與棲者儔



自大過渡河趨陂沙岡

凌春遠行邁游目恣汎越漸辨林中曙遽失崖上月觸  
物誰為情悲歎曷可歇載登隋疆場况眺宋城闕陽坡  
散初柳陰曲峙寒雪只此判氣候豈必殊燕粵潛潛濁  
河駛戛戛晨風發揚帆截驚瀨倚棹望窮髮鳬鴈眇難  
卽汀蘭翠堪結美人旣莫期天路復幽絕陂岡鬱參錯  
岸沙皓明滅日暮孤雲興何以慰忡悒

陽武詠懷陳平張蒼遂及博浪之事

玉璽戒不力金鏡淪無光  
大人既龍興烈夫亦鷹揚  
伊人各乘時矯若孤雲翔  
韓稚豈在屢秦氣日以喪  
六奇佐揮戈五運開靈昌  
時來屠沽奮跡往英雄傷  
平生冀風期况乃逾故疆  
灑淚越修垵含凄遡河梁  
古墳密嶢峴春沙鬱茫茫  
徒瞻松柏路詎申椒蕙芳  
遺榮竟何尤任智終自戕  
羨彼赤松遊援筆即此章

覽遊百泉乃遂登麓眺望二首

束髮懷幽奇覽籍冀有遇  
來登百門泉果協佳勝趣  
嵒

張圓波踊藹藹浮陽聚止坎渟泓冽激石迅湍注昔聞  
滄浪濯今解川上喻豈惟傷衛歌兼以發蒙慮况值春  
序中羣物已改故菰蒲冒清深鱗介各有慕行羨浴渚  
鳬靜對栖雲鷺巖霏空潭影林藹變朝暮極目北上帆  
朝宗感游寓

其二

發鞍憇林木杖策陟陁岵巖連嶺參錯洲曲岍迴轉白  
日麗蘭薄原綠靜如洗嘯臺旣清峻行窩更幽緬慨念

昔時人瞻望淚已泣薜荔夕搖曳蘿徑復誰踐碑板半  
磨滅石門積苔蘚代異道豈隔事邁迹空顯獨采石門  
秀眷此何由展逝鵠無卑音潛虬厭汙淺曠哉古今意  
難與世人辯

登大梁故城

登高與處卑由來慮多端登高尚寡悰處卑為能懼以  
茲歷荆榛褰衣躡巔岼土壕帶陰風樓櫓危急湍巖岸  
苦朋奔葭葦何漫漫周望鮮故物俯察多憂歎潛魚葦

其鱗驚鳥無停翰雲浮誠不任淵沉諒何難終附巖穴  
棲斯地非我安

德安趨潯陽

始征晨風息雲流日色展登陸艱且澁厲澗一何緬維  
時仲秋交颭颭林颭卷綠竹垂我車丹花映行幘冒巖  
雜有松繡石盡成蘚攀蹇雖多悅亘頓乃勞倦日中迫  
廬嶽蹊徑愈回蹇雲湧連遙嶂雨暗失近巘奔崩萬壑  
會巖絕一徑轉遽訝川梁沒幸遇石瀨淺道以習坎利

用待旣濟顯介石諒益固巨川豈遂眩誰哉能豫謀隨  
寓斯可遣

宿圓通寺

曉發蒲亭邑暮投石耳峯僕夫困霑濡山雨猶響松茲  
壑況深阻顧望惟溟濛幽巖託層房豁然臨猴江竹修  
芑北基巖峭垂南牕俯觀衆戶羅仰聆走簷淙挹此暫  
足遣遯想情難降陶公有遺墳黃子留孤踪通止良固  
殊羈縛誰為悰坐聞吟猿暝祇令歸思忡

釣臺亭成

颯颯風磴瀉累累山石峻卜構倚岑削簷楹闔奔迅俯  
之纔一壑仰面已千仞譟游竟日夕載色掖英俊故杉  
改新蔭魴鯉况充牣本輕任公釣詎慕庖丁办素飈裊  
延蔓商氣歛芳潤臨深悟邃奧覩逝識大順却笑矜名  
子羨魚一何吝

卧龍潭

出遊青天磴遂至卧龍潭重岑上無極白日蔽寒嵐巉

峭詎能步嶽絕誰可探歷石誠巍倨捫壑驚訝餘我行  
值秋季霜藟搖匡南午攀日忽夕足倦情逾酣雷瀑響  
巖澗孤花媚澄涵撫似悟命意循跡想名庵庵廢人跡  
絕巖剝文半滅世異坦道塞慨茲忍能說

始至白鹿洞

曠哉超世志緬邈平生思鬱壹眷名跡久注匡山陞南  
涉枉嘉命果諧夙所期仲秋巖壑清宮館復在茲白石  
激寒湍巖蘿裊空基黯傷逝者往密慚來者追性同道



豈隔途異理空悲興言懷昔賢日竟眺前岐榛荒徒鬱紆林崦一何采感情匪哀歎聊詠昭言垂

白鹿洞徧覽名跡

情高忽凌厲步健輕巉緬葛弱亦須捫崖滑每獨踐涉清愛重屢探阻遺驚眩始茲陟五峯遂憩松下巘巖桂紛始華石耳翠可卷追想白鹿跡伊人竟何遣觸端緒自縈薜荔況在眼慨歎意莫置顧望日已晚夕湖浴岑峭流光滅蘭坂命酒寫幽獨鳴琴且游衍

陟嶠

伊昔謝銜歸志頗諧綸釣甘追河上跡切慕蓬池嘯孰  
知紫芝慮竟荷青雲耀值秋歷江郡弭節登廬嶠沉深  
九疊秀峻極千峯峭錦繡亂岑崿晨夕改觀眺晶晶游  
氣歛皜皜寒日曜飛瀑信雷邁奔峽還龍跳耽遊遽忘  
歸久住輕時諠天池絕亦捫石鏡板可照矧茲二三子  
芬馥含清妙霜嵐澄西夕從歌傲希調

廬山秋夕

山壑寒氣早日夕風色緊火流桂將歇霜至蕙草墮蟋蟀集澗館禾委被疆畛感物憂自攢排遣情詎忍年徂身與衰時棄世所哂躊躇夜不寐起坐萬念軫崖傾月西流嶂曙松猶隱噉噉露猿啼行行采芳菌

落星石

千江勢欲倒蠡門支孤嶼輝輝雲崖映洶洶湍瀨挂霜水落丈餘石角露齟齬探竒犯崴涉停旄挈賢侶褰裳入松寺倚竹望風渚崩奔亂帆下蔽曳波鳥舉秋空澹

明澄浮山互吞吐靈根合道蘊曠蕩豁褊阻貞靡亞砥  
柱險可並灝瀕不聞永嘉勝祇因謝公許

泛左蠡

辭山意不悅水泛暫可樂微風逗帆席日鏡展光耀揚  
歌蕩溟昧鼓枻極窈窕指顧異晨暮俯仰改觀眺出沒  
湖中山明滅海上嶠素輕左蠡險今覲石壁峭謝屐久  
已蕪陶磯寂誰釣解吟松門詠令人發悲嘯

騎登謝址復舟觀於石壁

奮鵠有奇翰古鐸無追響游雲跡易滅鳴世情難想昔  
吟瞻眺詠今覲湖中賞松門旣岑峙川水深以廣昏旦  
候自變伊人竟焉往巖劓徒空嵌堂基鞠為莽靡徑不  
可識悲愉異今曩石壁屹寒岸葛崖嘯颺颺攬馭意已  
極登舟祇彌惘抱茲久延佇遵渚路回枉

南巖寺

巖高屯屋巨谷邃至跡罕仰之訝天缺登頓徒雲滿木  
零鵲巢露松冷猿嘯緩一滴聆不厭五級裊可踐

赴懷玉山作

始臨清溪寺不謂茲路艱崎  
踰南嶺轉見山鬱盤重  
陰起北谷凍雨響前巒  
志定邁孰禦勇往竟孤攀  
挽葛接懸狃架木凌飛湍  
律律巖壑變颯颯嵐風寒  
隔港望絕岫亭亭已雲端

至懷玉山會起書院

冒險登雲峰雲湧風不卷  
淒淒松霰響濡濡竹露泣  
沾塗意已困覩構色頗展  
故堂改顏制新築負幽巖  
伐材

但旁谷礮石況非遠清渠激修溜巔畝曠以衍偶至若  
期遇天定固良鮮仰止古有訓靜成力可挽祗虞遊業  
子捷徑為世莞

薛家樓宴

閑遊北城隅俯視清江郭洪川帶名都形勢自相錯樓  
觀藹鬱鬱街巷紛以漠北城良已高況陟城上閣輕裳  
拂倒景飛檻聆天樂夕山一何蒼夏潦彌井絡衝風激  
回流玄雲駭難泊暗觀逝者危遂悟居者樂慷慨亮易

感捫心果誰惡夷險非我為彈劍且盡酌

曲江亭閣

在豐城縣

纜舟金華潭遂陟岡上閣蹊徑阻紆鬱巖水光參錯夏  
林一何清餘雨浙未落高覽景自異况值晚霽廓夕日  
明錦湍歸雲擁華薄近山聿蒼翠遠嶺復岑崿曠蕩感  
遇寓俛仰歎今昨不見往者悲祗覲來者樂顧瞻大江  
流愈恨代謝速源湧竟誰禦謙守諒能曲所貴遺榮名  
覩義願有勗



發豐城屬江漲風便

午晴發豐邑挂席遡修瀨潮起果諧志風助利擊汰棹  
歌落日滿目波嶠外巨川信易涉貞固乃宜戒

武陽抵進賢

大宇流玄化生情互陰朗積霖夜猶注寒陽朝遽上肅  
肅晦色歛晶晶川水廣楓林一何赤沙嶼鴻競往涉河  
歷紆鬱登嶺暫停鞅撫江信縈帶鍾陵氣弘敞荆俗雜  
澆厚徵賦則邦壤佩刀豈民性剪戮歎幽枉

至後上方寺酒集

久陰晦昏氛我行值嘉明白日展冬耀雪霽松林清景  
異賞貴延朋集杯難停入筵午未端歸騎夕已冥衝風  
振巖廊鈴索抗高鳴塔虛響先奔珠圓光易傾超物慮  
可澹遺榮累果輕久枉証詮理一悟得所徵

上巳海印寺二首

勞生苦役役况乃值溫陽林園有嘉榮蹊渚生柔芳秉  
簡迹已陳祓契難獨忘駕言適蓮宇迂紆陟虹梁我宮

延暮色陂樹藹青蒼詎知幽勝區占茲佳麗鄉居然心境寂彌增塵路傷

其二

眺遠及麗辰登危開我襟秉炬躡佛榭杳杳夕光侵芳湖迥澄鮮幽隍覆層陰畢景沒長甸輕霏變春岑仰矚雙龍闕却瞻上苑林歸翼矯以翔鴻鴈多哀音會蔚桃李塲孰分松柏森

秋日重過上方寺

居閑懷行游觸景慨時速昨來春華敷秋草修已綠弱  
蘋布霜漣叢蘭委寒陸累累媚西陽漂穉滿空曲物遇  
信絲曠情移乃躑躅夷猶步前庭迤邐陟曾麓夕風一  
何厲行雲結相逐鐸音抗高聽塔影駭流矚聿非封侯  
骨虛疑燕頤肉飛纓靡不榮芒屨諒應足寄謝世上人  
吾久脫羈束

春遊篇

東氣散廣陌北杓指青陬美人惜春陽鳴鑣事遨遊遨

遊覽萬物紆遲駐道周京邑藹九衢合沓喧輪騶黃鳥  
集于林碧草生御溝御溝多垂楊芳樹夾朱樓卑崇冒  
休澤鬱哉帝王州

其二

朝遊東市陌暮出北城衢夕林何嶮岑華月耀西隅宵  
征泝皇垣廻策遵玄湖春冰日以薄鳬鴈聚喧呼逶迤  
浦淑貫金利據中區前有三石梁宛若垂虹紆却顧雲  
中觀翳翳蔽松榆

利疑  
作剎

春日洪法寺後岡

暄陽入廣墟平阡暖煙蕪稅鞅尋高禪陟丘眺神都白  
日麗中衢青霏謁林岵碧草一何萋叢葩亦已敷纍纍  
誰氏墳嶢嶭三浮圖鑿石錮九泉雄構耀城隅輿臺盜  
綺衣苔蘚封丹樞矯首視天宇剡剡浮雲徂崇名古所  
欽多藏祗區區

空同集卷十三

欽定四庫全書

空同集卷十四

明 李夢陽 撰

五言古

雜詩六首

煜煜雲中電流光西北馳僕夫夙嚴駕吾欲遠游之出門履微霜四顧何茫茫豺狼當路達鷗鴉薄雲翔改轍理方舟欲逝川無梁俛仰歲將宴愴惻涕沾裳

其二

西國有佳人獨立青雲端容豔若桃李左右佩芳蘭含  
思理玉琴泠泠一何閒更節有餘悲曲終再三歎借問  
歎者誰中意難自宣沉吟攬衣帶仰視鳴鶴翻思阻望  
不申何況隔丘山

其三

枕穰蝕以傾梁棟誠獨難流言播四國周公有疑患涼  
飈激頽景奄忽不可攀衆羽日繽紛朱鳥戢其翰殺身  
苟無益去去從所安傷哉式微詩千載起余歎



其四

明月照我懷耿耿殊未已霜雪委如山悲風中夜起攬  
衣仰天歎涕隕不可止十生抱荆玉捐軀剖終始青蠅  
條來集白黑反在此城闕屹九重浮雲日千里我欲竟  
此曲此曲悲且苦

其五

淒霜變為電二氣歛而藏天道有代謝人謀豈恒臧北  
杓酌元化亭亭自低昂上帝棲紫宮衆緯錯以行謂山

蓋高有梯可陟謂淵蓋深有舟可涉自非雙黃鵠天路  
安可躡

其六

茅以勑為席柏以勁為薪君子憂治世愚者幸不辰張  
置以待兔雉也蓄其身物理雖云殊罹脫各有因浮沙  
卷奔藿朔吹揚驚塵日暮臨大道悵望曷能陳

雜詩三十二首

英雄樹大業奮志常慨慷捐身赴國仇效命爭戰場明

甲耀皎日挽弩千石强矢石下如蝟殺聲如沸湯被刺  
目不逃貼危氣益昂雄名輝冊符生死固其常

其二

大司肅制度鴻儒振英儀生殺原異門為獸視厥施我  
冠巍堂上巧笑美容姿狐心生暗鬼耳聞佯不知膏粱  
媚妻妾無賴充王師白刃起如林狗馬用羈縻榮達信  
有命歎息將奚為

其三

共工觸山折夸父去無還  
媧氏懷憂傷鍊石思造天  
妖姬鼓哀瑟嬉戲玉臺間  
草昧怨無侯哲者中自煎  
小鳥填巨海蘆灰遏洪川  
力誠有不及心情長可憐

其四

昔余曳鳴珮謁帝扣天閭  
聖人垂衮衣賡歌庶事康  
成不我顧奄忽驅龍翔生  
死變化理反覆開存亡榮  
華有銷落連茹切微霜晨  
朝在須臾返車棲扶桑

其五

命駕將何之意欲快我心蠻方亂如麻匈奴寇榆林揮  
劍誓俱亡彼軍忽如沉豈為尺寸勲國仇怒至今崑崙  
貢織皮鷗鵲懷好音功高固不賞讒妒來相尋哀哉險  
側子傾詞誰見欽

其六

大道竟焉陳末運忤相欺讒疑進貝錦交亂令心悲鷗  
鵲翔茂林烏鵲遊下枝人情有偏好觸意生乖離長門  
緒清吟魚肉怨新詩玉分石見仇咄嗟當語誰

其七

遨遊寫憤懣，駕言凌洪濤。洪濤非我遊，改馬登山椒。朔風一來至，林谷何蕭蕭。鬼怪時以興，雲逝誰能招。禽鳥相聚鳴，原獸復晨號。置此勿徒苦，乘雲可宏翺。

其八

有行東園椒，結實何纍纍。條遠敷，不易斧。斧者見行，摧燕雀。本小鳥，志欲翀天飛。哀哉不自諒，失路將安歸。

其九

悲風厲歲晏宵旦未云已寒冬雨雪至江漢驕南紀臨  
堂翳孤松杳杳歎成理涼潦不溢澤時鴈鳴高起一飛  
摩青天倏忽乃萬里訊言蓬蒿士杳杳竟何以

其十

晨出進賢門南向望東鄉清川激崇岑彌野何茫茫白  
骨皸四隅羣鳥噪枯桑闔門已殺戮鷓鴣復來翔日昃  
時易冥漏網頓天網思此愁我心還車眺何梁玄鶴斬  
高鳴於世常激昂一逝聲影滅誰哉見孤頑

其十一

登山望四海日夕忽至沉俯身眺城郭痠然沾我襟交  
路夾芳蘭逝駟何駸駸朱樹藹閒榭奇巧媚荒淫北里  
進異舞高唐呈妙音纖羅振芬芳朝雲遮嘉吟不見秋  
至草零落愁春心

其十二

兀然坐空堂戚戚恒竊悲曠世懷一鳴燕雀翻見欺惡  
名收范公文致詆朱熹身親罔自明萬世余焉知霜露



隕華草顙顙今其時百年俟論定恃此良可嗤

其十三

倚閭遲佳人日莫期不來拂衣舍之去去上延秋臺旗  
旌蔽原坂鼓角鳴且哀黃鵠翔不下腐鼠鷗見猜壯士  
憤國難撫劍但徘徊白日倏西傾愴惋肝肺摧

其十四

灼灼綴枝華榮豔一何好朝陽溢其葩餘光照寒槁冠  
蓋沓衢路致身競先早磬折名譽場銷鑠成醜老一夕

不復晨隕落隨秋草逍遙可竟世繁華詎足保

其十五

陽回杳無朕朔風振江郊翩翩者何禽銜枯創新巢長  
短有成理環也特其遭窮者非盡愚顯豈皆賢豪羲陽  
奄西馳今夕明復朝如何途路子得意恒自驕

其十六

無榮亦無辱倚伏還相隨韓侯歎良弓寧復歌昔時華  
春敷明陽各艷容與姿孤松秀嚴冬歷世誰可期照耀

東門瓜前貴今豈知較計毀譽間無乃賢達卑

其十七

昔有玩世士乃處匡山阿其人久已冥春林發煙蘿故  
址栗里菊見者不忍過荷鋤豈不苦刈薪行且歌詆毀  
日來加醉酒良靡他沉冥在一時千載固難磨小兒為  
督郵磬折將如何

其十八

昔余遊淦南曾上升天臺茲也誠玄冥萬里悲風來松

柏摧路傍玉梁安在哉舉手招王喬三洲限蓬萊黃鶴  
舞高岑清雲曳徘徊歎息長久衍愴惻令人哀

其十九

玉梁不可遊回登懷玉顛應龍歆白霧接我升雲煙憑  
軒望四海溷悶良可憐可憐者誰子白馬來翩翩明哲  
困糟糠庸子驚輕軒嫵婉逞一顧力達成過愆傾城亦  
何益傷哉誠嗟歎

其二十

黃塗亘東西六龍駕天車一馳濛汜間百計無奈何彎  
弓倚扶桑抗手招陽戈浮雲徂我前逝鳥鳴相過鳳凰  
愁丹山溟海日夜波行行欲安之念此紛滂沱

其二十一

今日苦炎熱風雩可徜徉亭亭一孤松乃在匡山陽李  
公宅深冥朱氏揚其芳仰身攀林巖俯之淚數行勢路  
紛狹斜隨利來相戕命駕且復去誓與朱鳳翔

其二十二

貴賤各有命昧者若保持殷勤話言接轉面不可知一  
言相千秋冠蓋赫來馳鸚雀鳴梧桐喻習鸞鳳飢雞鳴  
市朝動董生方下帷

其二十三

惺惺懷坦途由之乃江河波起旁所駭舟中如室家中  
林設暗罟鴻鵠逝九阿讒巧誠相戕飛鳥日暮過修短  
自然理作色將誰何

其二十四

匡山有老人自稱巖下公綠髮渥朱顏皎若雲間鴻往  
來騎白鹿娑美精內充招我將從之心阻難遽通流情  
復高翔翩翩駕天風夙昔思此人寤言期與同感此重  
狂顧德音常在衷

其二十五

騶虞不食草志士寧苟安矩步揮芬芳凜義不可干吐  
辭程大猷妻子常飢寒中心思美人遥夜起長歎延頸  
望西岐欲鳴途路難躑躅待天晨宵夜徂漫漫明月鑒

房帷涕淚交沆瀾

其二十六

臨事戒憤切憤切增煩心君子被短褐小人富黃金璇  
機造變化何浮不有沉不見遊波蛤前是簷中禽池鷗  
奮羽翼倏忽四海陰沐浴濛汜間飄飄終鄧林

其二十七

少年撫長劍放浪三河濱累累道旁者云是金鄧墳歛  
翁隨龍飛策符登茂勲南陽多貴人烜赫闐朱輪委身



今黃土千載不復晨首陽有米薇餓死誰為聞遺義凜  
秋霜見者常酸辛

其二十八

自聞鶉鳩鳴於心懷憂傷陰氣馴以厲庭草隕繁霜聿  
蘭萎不榮瑟風遊素商浮雲晝易冥白日時漏光登山  
期所思反見高鳥翔蹀躞豈規步訛言倘壽張揮袂層  
霄間撫劍增慨慷

其二十九

昔余挾詩書京里揚鳴珂數薄藝林間結交聚邊何豈  
云傾人城絕代耀姿華分散倏老醜孤遊江湘阿出攀  
芳桂林倚岑揮浩歌荆榛蔽邱原浮雲一何多靈劍有  
合并詠言傷蹉跎

其三十

莫笑一杯水覆地東西流人命若飄光起忽誰能留  
藜藿足充饑巖巒可遨遊衣文附靈犧莊子誠見羞黃雀  
乾下庖白刃臨九州一為華屋吟俄頃歸山邱脫身幸

及今世事如蜉蝣

其三十一

毀譽不可校校之心煩悲榮名蓋一世千載誰見之塞  
翁失其馬馬歸駒來隨生死尚無常萬事誠塵灰舒嘯  
飲醇酒聊與玄化嬉

其三十二

窶人困貧賤切切常自悲達者競先步所苦名位卑旦  
榮夕暮零二者誰復知二者不可知懊惱將何為不見

曠世子埋沒隨蒿藜

雜詩

宛宛春田鳩飛鳴柔且閑一朝化為鷹肅肅厲羽翰衆禽不敢並孤立秋雲端鳥既不自知人胡究其然

其二

縣縣谷中葛引蔓在脩楚脩楚伐為薪葛也安所附豈無絺與綌可以禦清暑烈烈嚴冬時憂君乏續絮

其三

汎汎河上舟搖搖靡攸止我欲維此舟川廣不可涘振  
振鳬與鴈棲食在波水豈不良幽冥夙心耽樂此

詠古鏡

熒熒堂中鏡皎皎懸秋月寵移明與奪勢滿光仍  
缺美人昔提攜拂拭生皎潔用以奉君子義投物  
不忽良無刮磨費豈謂遽乖絕悲故情自慙爭妍  
道所劣掩抑經冬春蕪蝕怨芳節黃鳥及候吟朱  
蘭有時歇推移準運理顯晦遵前哲顯晦亦何憐

所歎在乖別

雞鳴篇

宛宛天運周雞鳴夜復旦疾者寡長寐思者多寤歎痛  
憂積中腸緒理一何亂衆人沓經營君子樂衍衍高山  
變為陵深谷化為岸願從詹氏卜乘槎問河漢

潛龍篇

驕陰不可制堅冰憂我畏陽馭倏來返玄律播陰風譬  
彼晝與夜循環固難窮古人間行旅九市禁相通陽升

懼不力靜以收其功養木當其萌養德當以蒙眇哉一  
絲微奈此羣陰攻脉脉淵泉底疇能拔潛龍

孔翠篇

孔翠耀其羽廼為俗所珍神龍處九困潛躍固有因小  
人役瑣屑君子揚其芬遐哉顏閔烈千秋灑靈零出事  
金玉昆人奉堂上親恩義苟不虧豈必饌芳薰爰騁六  
藝圃載泳詩書津何當繼喬木振珮躡高雲

有鳥二首

有鳥東方來長鳴向西北竦身欲縛鳥自顧無羽翼白  
日蔽高陸玄陰視無極風飈晝烈烈積霰墮我側星紀  
雖云周沴氣尚難測逝者一何速來者懼不力杖杜生  
道左孤桐棄遐域雖懷壯士情詎補陽和德

其二

一為羈旅士遂使年歲積人情感新故慘慘不得釋夜  
視天上星翳翳雲霰隔陽道卽光明何由布德澤離居  
多隱憂悵念在今夕借問悵念誰是我同袍客豈謂涼



暄殊所歎阻疆場緘書寄游雲會託南征翮

空同集卷十四

欽定四庫全書

空同集卷十五

明 李夢陽 撰

五言古

裕祭頌述

弘治十八年歲除日作是時武宗初卽位

嗚呼大聖人肇迹或漁樵蒼龍戢其角志固無丹青德  
祖始側微濬葉開皇朝禮蓋視后稷面南統羣昭大哉  
九廟義親盡敢不祧再遷及皇熙世室閔以寥裕辰復

來集鳳皇鳴簫韶惟皇率百辟孔祀自今朝白日照寶  
旂御氣如絳綃將將磬筦鳴颯颯靈旗飄恍惚帝醉飽  
諸王亦飄颻下有開國勲偃蹇羅金貂愚臣叨對越精  
魄為之搖鼓鐘送羣公玉戶風蕭蕭唐侯昔踐位十八  
號神堯皇實秉敦默龍性無逍遙道合天人際志與神  
明超降祉倘冥漠四海無征徭

清廟篇

巖廊肅文欽芳區恣幽騁寬糾豈異性拘曠本殊境欽

岑路寢東森疎嘉樹靜珍叢媚朱夏秀幹揚修景曳裾  
羣彥集挂笏萬慮屏仰望南城苑飛除帶崇嶺巖巖白  
玉閣要眇黃金井季主飾觀眺哲王擯遊幸自非淵聖  
姿誰保天步永

丙寅元日朝退有作

赫赫大明朝皇皇啓八葉諒闇在冲齡憂勤纘洪業真  
人改革殊屢覩禎祥協春王肇元載萬國咸臣妾端冕  
御茲辰縹緲仙雲接神飈翊紫蓋翔龍舞浩劫哲后畏

天威惕若春永涉古編昭日星有躅尚可躡大哉五始  
義允矣三陽決

從軍

主客互勝負邊塞無休兵壯丁戰盡死次選中男  
行白日隱磧成塵沙慘不驚交加白骨堆年年青  
草生月黑夜鬼哭鐵馬聲鈔鈔開疆慙未已召募  
何多名蕭蕭千里煙狼虎莽縱橫哀哉良家子行  
者常吞聲

其二

從軍日已遠，備茲途路艱。  
驅車太行道，北度鴈門關。  
天寒雨雪凍，指墮曾冰間。  
登高望虜境，白沙浩漫漫。  
單于數百騎，颺颺獵西山。  
殺我烏玉弓，赫然熱肺肝。  
安得奮長劍，一繫名王還。

其三

別家亦云久，昨得家中書。  
書中何所云，父母與妻孥。  
昔來柳依依，素雪今載塗。  
豈不念還歸，天子擊匈奴。  
登山

眺故鄉存沒兩嗚呼丈夫死國讐安能戀里閭生當取  
封侯怨別祗區區

其四

久處行伍間漸知苦樂情能蹙丈八鎗徒御不我輕府  
帖昨夜下燒荒有我名秣馬待天曙肅肅寒霜零左韉  
插雕羽雄劍躍且鳴日高渡黃河東過受降城所羨在  
滅胡富貴何足榮

屯田



葉落歸故根孤雲有時還  
山年閭里盡誰門今幸全  
者自何歸皮膚半不完百  
租叢其身欲訴誰見憐吾  
家十八軍獨我猶從戰昨  
當戰交河左髀貫雙箭本  
不識犁鋤况復千畝租三  
訴吏不語鎖頸投囹圄

其二

日落蒼天昏奔馳吏下屯  
揚言科打使論丁不論門  
老軍出聽邠老婦吞聲言  
邊城寡機杼耕種育兒孫  
誅求餘粒盡竭力秦孤豚  
昨當統管來宰剥充盤飧  
言旣復

長號吏去收他村

塞上雜詩

邊烽日夜至飛符來會兵羊牛入高砦雞犬皆震驚壯  
士按劍起鞍馬若流星鎗急萬人靡笑上受降城生繫  
五單于歸來獻天庭

其二

胡兒追野馬迸蹄若驚鴻一馬帶雙箭墮我邊壕中敢  
望不敢近躊躇各按弓抽身復北去天寒沙磧風

功德寺

宣宗昔行幸遊戲玉泉傍立宇表嵒窠開池荷芰  
香波樓遞感沓風松奏笙簧百靈具來朝落日錦  
帆張萬乘雷霆動千巖滅流光綺繡錯展轉翠旗  
沓低昂法眷撞鐘鼓宮女拭御牀笙鏞沸兩序星  
斗宿巖廊至尊奉太后國事付三楊六軍各宴眠  
百官守舊章巡非瑤水遠跡豈玉臺荒嗚呼百年  
來回首一慨傷鳳騰赤霄暮龍歸竟茫茫山風撼網

戶紫殿生夜霜退朝值沐休我行暫翱翔娟娟登岸  
林慘慘度石梁廢道哀湍寫松柏間成行啓鑰肅覽  
歷過位增悲涼積久灑掃缺乳鴿鳴膳堂舊時琉璃  
井倒樹如人長神已佐上帝教猶託空王鈴磬颯鳴  
戛晨昏禮相將盤遊非聖理操縱在先皇至今朝廷  
上不改舊紀綱

翠華巖

洞劉耶律詞其名翠華巖俯視聳觀閣仰面攢松杉厥

維何王代鬼斧開嶄岩精氣久削薄烟嵐鬱相攬屢憩  
驗足薊獨往悲情兀入蘿畏石墜轉嶠驚日銜飄飄萬  
里風吹我秋衣衫放迹慕康樂入道懷賀監載思武陵  
避愈悵桃花品去往亦由人極目江上帆

望湖亭

來登望湖亭始盡覽歷妙布席倚岳嵌波望領佳要山  
花落天鏡鉤簾巨魚躍岩潭通隱見圓浪浴奔峭岵嶺  
百萬閣日落展光耀羈縛阻延放臨淵羨孤釣霜寒葭

茭白沙晚鵲鷓呼吾非阮生倫於此亦長嘯

呂公洞

厓根豁一門怪石相撐拄豁訝自吞呬白晝亦風雨陰  
處汎清泉積苔陰鍾乳往聞茅山勝夙慕華陽主路遐  
限孤往條歷十寒暑經亘騁心目小憇偕道侶茲洞雖  
人境固足託茅宇惕然忽內咎我何戀簪組

香山寺

萬山突而止兩崖南北抱鑿翠置殿榭級石上穹昊高

卑各稱妙曲盡結構巧有泉如線縷盤轉出松杪嗜奇  
忘登頓緣危肆探討險絕逼牛斗蕭颯若風島夜宿來  
青軒天色碧可掃湖沙靜莽莽海月白皓皓想當邦邑  
初此地只蒿草綺麗仡誰鑿岩壑爛相裊但看全盛時  
民力為茲槁

平坡寺

西山萬佛宇爛若舒錦繡平坡憑風迥突出衆山右宮  
閣因岩坳面勢巧相就百里見琉璃截嶼戴雲構朋遊

探絕迹杪秋歷羣岫得此目力展恍疑出氛囿仰看北  
斗逼俯恐東海溜雄壓香山麗閣掩望湖秀落木響岩  
牖寒嵐染衣袖延緬古今并佇立悲慨湊盛衰慮反始  
危基有傾仆千載誰復臨逆想蓬蒿茂

天寧寺觀塔碑

舊瞻天寧塔今覽天寧寺茲塔多鬼怪光芒夜夜至不  
知何時殿結構今頽棄剔蘚讀其碑識是隋文季蚪蚪  
半剝落蛟龍猶罌我來值時暮攬逝發潛喟修陸控



趙代長山衛燕冀蒼然野眺合一灑楊朱淚

鏡光閣

我生走紛境性意若不適  
謁來鏡光遊不覺祗樹夕鳥  
藏丹閣暮蕭槭柿葉赤香  
如造岩壑聞其寡人迹其王  
戴金冠天子之所客  
迓我蓆蔔下坐我紅罽席  
落日入虛牖窈窕雲光白  
團團石蓮燈照耀錦繡壁  
忽聞鈴磬發轉悵俗務迫  
靜躁本殊科利義各有癖  
伊余竟何為奔迸阻行役  
乞君摩尼珠一照幸不惜

媯皇墓詩送喬太常

正德元年上以即位遣官禮百神太常喬公奉命  
祭告作此送之

伊聞女希氏奮迹鴻荒日神功義農並吹簫豁陰鬱  
極本寓言蛇身竟恍惚遺墓趙城側古廟松杉密霍嶺  
峙嶠岿汾川眇蕩潏穆穆秉德臣肅肅奉瞻謁祈靈沂  
遐躅明裡備精物天雖積清氣運久恐漏闕徒煉五色  
石寥廓詎能越送子顧周道俾我心於邑

三忠祠

憶昔漢諸葛龍起答三顧志決竟星隕嘔血為軍務鄂  
國與信國屹屹兩玉柱殺身不救國冤憤水東注往事  
勒鐘鼎新廟傍官路慘慘冠劍並凜凜生魂聚翠旗晚  
明滅徃徃鬼神駐懷歎各不申翻然向煙霧我征久奔  
迫過此感傷屢時來展肅謁繫馬門前樹香臺野嶽上  
羅幔虫蟻蛙烈士為吞聲清風激頑懦

艮嶽十六韻

城北三土丘揭嶼對堤口黃蘆莽瑟瑟疾風鳴衰柳云  
是宋家嶽豪盛今頽朽我聞帝王富東京實罕有鑿池  
通嵌竇移山媚戶牖岌岌樓觀合歛吸風雷走岩陰翡翠  
吟海窟蛟鼉吼燕趙矜麗人搜剔充妃后君臣互沉  
湎斯道詎能久嗚呼花石費銖鎰盡官取北風卷黃屋  
此地竟誰守迢迢五國城二龍回其首向使任忠良邦  
國得減否余來值寒暮悲歌坐林藪狐狸竄古壘破瓦  
沒藜莠孤城峙我前蒼蒼日將酉

天馬

天馬從西來汗血何歷歷天子顧之笑置在黃金櫪鳴  
呼神駿骨草豆日蕭瑟瘦骼突碑兀銜轡掛在壁白日  
涕至地青雲志拋擲朝望碣石津夕盼流沙磧猶能肆  
橫行倘君賜鞭策

古意

有鳥何方來哀鳴向西北我欲縛此鳥天路險且棘悠  
悠浮雲行照我暮顏色丈夫重幾微男兒死邦國長鯨

一奔逃萬網不可得平生反掌志對此空歎息亭亭特  
生杜道傍皖其實孤桐雖良材棄擲處遐域而余竟焉  
往嗚呼淚沾臆

遣興

金陵固麗地幽薊亦名城皇天作南邦北斗開瑤京萬  
國梯航入宮殿造泰清大哉帝王居閭闔開崢嶸神靈  
自環拱海岳相迴縈禹功肇胼胝湯也勤四征煌煌肯  
構訓聖人垂其情

其二

四海為我土九夷盡來王貢琛至北戶北至玄谷陽我  
祖秉天鉞血戰開其疆當時受命佐一一皆忠良噴薄  
倚日月勲名表旂常凌烟肅遺像萬古瞻騰翔乘運雖  
有時盛業當自強

歲暮

軒坐意悄悄感此歲年暮一氣有肅殺昊天縱霜露衰  
容搖萬物日月立復度赤驥初長成自謂中君御揚鞭

過都市萬馬不敢步天寒草蕭瑟側塞在中路良辰不  
再至我髮忽已素不見古賢達盡被名所誤沉吟惜蟋  
蟀延佇羨鷗鷺終然託遠適餘者豈足顧

苦熱

伏陰固當奮亢陽乃逾緬嘈嘈蟪蛄鳴樹杪風不展上  
天收雷雨萬物沮沾洗推案忽大呌羣馭何時返赤日  
厚地裂揮汗無晨晚古時有虞舜彈琴理驕蹇軒轅制  
六律四序無乖舛何當挽二聖吾欲遂仰偃



十五夜

夜陳芳宴會座有離羣友中秋而無月何以慰尊酒賓  
主慘不樂周席盡回首向黑明燈入雲景爛虛牖尚覲  
光破漏時問陰薄厚吁哉至精物汝亦蒙此垢上天悲  
隔遠人生怨分手月既有開塞吾寧息奔走霜露棲蔓  
草疾風下高柳勸君聊盡觴居諸亦何有

十六夜

四海蒸為雲三夜皆天風他方縱有月不照長安中長

安十二樓戶牖鑿瓊瓏貴家金張徒高宴開幘幪華燭  
代明月何必光遂通夕露久已晞懽娛良未終通塞諒  
有殊盛衰寧見同悠揚雲中覬旣滿還自窮鬼神惡盈  
踰天道懷其公

十七夜

幽意竟不愜待月坐沙際久陰固當豁明月忽墮地桂  
枝沒半輪蟾兔職業廢嫦娥飾粉妝愁絕雲樓閨鸞憂  
不解舞竟夕掩孤袂崔嵬黃金闕何由訴天帝景破力

不敵光滿雲仍蔽，徬徨步林樾。為爾一流涕。

小至

日為衆陽宗，來往成謝代。來之生萬物，往以告成  
歲。亭亭羲和駕，建此南飛旆。雙龍服偃蹇，流雲翼  
其外。和風卷凍霧，重陰颯無賴。樞知化工幹，冥與  
天意會。大君肅嘉禮，君子幸亨邁。誰能助新陽，為  
我激靈籟。

贈徐子

偃王世蕪沒石麟亦埋翳徐子發東吳英論有餘地龍  
遊滄波阻日出浮雲蔽嗚呼獻玉士竟灑荆山涕光掩  
明珠棄寵奪西施廢古來共如此不獨君遭際余本澹  
蕩人傾蓋託末契酣歌繼旦暮醉酒無陰霽各為征蓬  
散吾豈匏瓜繫舊時南陽宅回首成迢遞蹈海有夙期  
與子自茲逝

七夕遇秦子詠贈

皎皎河漢月照我西南樓七夕遠賓集置酒城東陬展

席對雙星盈盈隔中流豔豔靚粧女欲濟無方舟神爽  
卽易合茫昧竟難求明明君子德寡妣誰為仇豈無采  
唐約失身良見尤人生信齟齬世事良悠悠不見古時  
人皓首猶公侯葵藿不餓死富貴安可謀願繫塲下駒  
盡我盤中羞我今為秦聲子也當吳謳酣歌達清曙臨  
分贈吳鉤

贈王御史十四韻

夕寒風自起集雪耀中宇朗月一何速早已爛芳醕邈

近我蘭友設尊歛清語連翩忽竟夜悲歎為故侶瑤華  
雖莫折羽觴時復舉念昔青年日共矯凌風羽啄食九  
天步宿必華池渚中路更險艱風波各失所大明盪妖  
氛迴光蔭衰腐諸賢既連茹王子豈羈沮餘生實自慶  
追念良已苦撼促廣陵散愴惻山陽旅事諧終合并感  
往徒心楚棄置且安寓懽娛弄尊俎

酬伊陽殷明府追憶見寄十四韻

弱齡負奇節志欲凌海岳白馬金陵來遊戲宛與洛出

從七貴飲醉調五侯  
謔妍華不見售  
讒巧恩愛奪涼風  
卷團扇世路隨飛蓬  
謫居宰山邑頗喜占名郭  
川嶺鬱森秀烟雲日噴薄  
况當素秋霽清霜掃天末  
龍門旣竦峻伊水復澄豁  
啓牖眺飛泉據案望岑嶠  
獨撫巖中琴遙枉汴上作  
懷賢諒在茲感舊但如昨  
徒然佇王鳧未果偕緱鶴  
終期謝紛袂攜手向嵩岳

與殷明府期嵩少諸山不果十四韻

旅寓限崩迫騷屑隘煩務  
向來嵩少約屈指謂旦暮  
豈

惟攀時彥兼欲展秋步僕夫戒衣糧車馬亦充數胡然  
泥行邁遂此歎乖違我我雲中峰阻爾獨何故佇瞻風  
嶠突側耳石泉注夜來逍遙夢忽落嵩山樹纍垂松猿  
噉澹沲岩姿露存已超彷彿醒若涉顛遽彼美眇何許  
茲端愴難屢采蕙忌及晚我疾畏晨露烟蘿四時佳春  
服易為具河陽羣葩發振策冀有遇

酬秦子以曩與杭子并舟別詩見示余覽詞悲  
離愴然嬰心匪惟人事乖迺信手二十二韻



無論工拙并寄杭子

憶年二十餘走馬向燕甸  
縉紳不識憂朝野會清宴嗜  
酒見天真憤事獨扼腕  
出追杭秦徒婉婉弄柔翰探討  
常夜分得意忘昏旦  
雪雨亦扣門僕馬頗咨惋  
歲蕤香山閣崑崙蓬萊殿  
登頓窮目力延攬俾壯觀  
孔翠不易馴人生本無絆  
蕭蕭田中蓬隨風各分散  
杭生比適越秦子遊瀍澗  
南北兩文星光芒亘霄漢  
余衰更乖謬挂一每漏萬  
夙遭青門斥差勝黃州竄  
偃息於沙澤遨遊

傍河岸秦也雖共區累月不一見秦實困勞冗余亦怕  
梳盥何況阻疆域杭也江之畔怵怵睽隔積鬱鬱歲年  
換無計脫煩促轉坐迫滋蔓再讀並升篇愈切山陽歎  
誦言各欽德悲離古所患

暮春逢林子邂逅殊邦念舊寫懷輒盡本韻


赤驥奮途路神龍厭池沼不登泰山頂豈見衆山小明  
公昔際遇志與青雲香爛承夕扉詔番苦司隸擾君平  
實憤切軒然爭臣表朝野凜生氣樹鮮安巢鳥名孤衆

毀集竄薄憂心情一投海濱郡遂守荒江眇遼遼嶺南  
國借爾揭文旒中天行日月憂憂孤鷗嬌君雖關內產  
迹自閩中聲業從考亭入統為橫渠紹伊余放曠人漁  
潛侶荷篠亡羊以多岐望洋徒浩漭睽離歷十暑邂逅  
值春杪日談恨易夕夜坐忽及曉苑花雖寂寂風絮尚  
嫋嫋回首通州別屈指日不少今看兩白髮誰忍置清  
醪君行秉大軸吾歌入幽渺林岑有夙愉烟蘿聞裊裊  
誠無王良顧空山沒驂裊

安南歌送許給事中天錫

芳阡藉文轍垂楊綰鳴珂使君且勿發聽我安南歌安  
南古夷隩嶺嶼蔚陂坳炎原吼象兕溟窟虺鼉鼉爰自  
秦漢降惜怛尋干戈天皇操化樞環海無驚波永執臣  
妾禮稽首心靡他珠犀走北陸翡翠供虔羅王臣乘四  
驪馱馱金盤陀朝濟白藤江暮涉富良河白日破蠻霧  
銅柱孤嵯峨雕題覩漢儀巴舞何傿傿皇仁罄所宣紆  
征采民哦使君聆我詞慷慨不顧家僕夫仗明鉞絳節

拂林華樓船下煙淑鼓吹達海涯



空同集卷十五

欽定四庫全書

集部

空同集卷十六至

詳校官監察御史<sub>臣</sub>龔驂文

中書<sub>臣</sub>劉源溥覆勘

總校官進士<sub>臣</sub>繆琪

校對官中書<sub>臣</sub>袁文邵

謄錄監生<sub>臣</sub>李傳燮

欽定四庫全書

空同集卷十六

明 李夢陽 撰

五言古

沐浴子

王盤兩鴛鴦拍拍弄蘭湯  
振衣馨香發彈冠有輝光  
豈念蓬首女含情怨朝陽

怨歌行

漢主十離宮涼至花盡歇  
面窗牕玲瓏煙紗印秋月  
天



公顧我笑手弄雙玉玦但笑不肯留去若流雲沒憂來  
抱團扇揚顰望丹闕

少年行

白馬白如雪銀鞍耀明月騎出青雲樓揮鞭向金闕自  
言事武皇出身為椒房結交樂通侯擅名鬪鷄場尚主  
復賜第軒蓋一何光被酒過都市殺人如剪蒿左殪南  
山虎右斬北溟鰲昨朝兵符至單于寇臨洮奮身出玉  
門殺馬鬻寶刀橫行萬餘里叱咤威風起奪馬貳師城

長揖見天子調笑大將軍醉罵柱下史生憎漢相如白  
首文園裏

長干行

皚如玉山雪皎如瑤臺月郎來騎白馬調妾桃樹下桃  
葉何柳柳不謂君行久倚門問來船見郎寄書否

宋中詩

六鷁退而飛乃向宋都過四海一震蕩青天白石墮世  
人見此鳥仰面忽大笑誰知影不滅千載落光耀余方

卧空山聞此一長嘯

河上公

昔有河上公結廬蓬蒿下萬乘時一顧旌旗蔽原野手  
揮玉如意顏貌何瀟灑曳裾授道經談天妙無窮清光  
耀白日四海高其風言既忽不見竦身躡星虹鳳凰棲  
梧桐鸚鵡雀巢寒蓬飢鳶嚇腐鼠笑殺高飛鴻物固有如  
此何必較愚蒙

邯鄲才人嫁為廝養卒婦

妾本寒家女誤入叢臺宮粉黛三千人花顏笑春紅君  
王重歌舞幼小不曾通一朝意相許棄擲如秋蓬昔為  
高唐雲今為馬牛風夜夢邯鄲道不識邯鄲中金殿秋  
月滿歌吹行煙空白日耀千春何時燭微躬

送友人入關

南山鬱幽幽豐水白浩浩鳥啼漢城樹塵起咸陽道驄  
馬東方來長鳴翻玉蹄春風吹綠草明月滿關西

送李生京試

黃龍王帝宅紫極繞逶迤爾行霜雪盡恰值春風時天  
起桃花浪煙搖御柳絲要知走馬地非是冶遊兒

送友人之京

與君何處別汴州金梁橋下有古時水遙接廣陵潮君  
搖錦帆去萬里上雲霄我掇金光草方期白鶴招

其二

鳳凰鳴珠樹紫鴈滄溟外賈鄧登雲臺寧說富春瀨此  
情難具陳臨河挽衣帶積雪太行路明滅客行邁

其三

田方澹蕩人侯嬴亦監門老馬尚悲辛肯負信陵言寶  
劍贈烈士明珠報王孫縱令滄洲去終戀紫宮恩

春日東王相國

白露墮瑤草佳人秋思悲葉落今幾時忽復春風吹  
榮華習殘雪故柯發新蕤為問酒狂客金尊開對誰

避暑

避暑空林酌行歌采綠薇南來一行鷺倒映金尊飛淹

留桂樹夕瀟灑  
菱荷衣明月宛相待  
休賦醉言歸

余園夏集贈鮑氏

曉挈金玉友  
出挹池風清  
脫巾薜蘿下  
悠然聽流鶯  
白雲行杯中  
紅蕖媚初英  
得意時自笑  
冥哉塵外情

贈鮑演

我愛汝長子  
遠志日超忽  
浮雲似其心  
秋水清到骨  
縱酒見天真  
探桂遲月窟  
攜手眺大野  
滄波杳出沒

其二

蒲亭杳何許雲海日浩蕩團團桂枝月秋照沙溪上幾  
負春草曲空餘采菱唱盈盈吳門水何時理歸榜

把酒

把酒望天地邈然無可親龍蛇洞庭浦雪霰洛陽春霧  
林坐鳴琴煙迳無歸人相思東山月夜夜懸西秦

贈張生

怪爾辭江漢長歌入宋梁北風吹凍野歲晏天雨霜老  
馬棄不育悶殺田子方拍手笑侯嬴捐世計不彰顧瞻



臺闕地寒莽但蒼蒼

其二

攬衣斷崖口悲風振古臺  
叫鴈驚逆雲萬里天為開  
雪榛覆寒莎松殿扃餘苔  
昔人邈安在日落寒色來  
棄置勿復道且酌黃金杯

別田進士

子望河上雲我望城中月  
不共眼前酒況乃天外別  
白沙亂海曙黃雲下燕雪  
後期轉超忽吾將泛溟渤

歲暮夜懷寄友

梁客梁甫吟北風號沙林連山激湍波海氣結愁陰雖  
持一杯酒而有萬古心越鳥不巢燕代馬不戀越天明  
太行雪霜凍洛門月颺颺湘流深冥冥蒼桐隔逝矣徒  
離憂芳蘭為誰結

其二

歲窮長年悲越吟遊子思寒風起枯楊夕坐知天霜落  
星動海白飛沙吹雲黃蕭蕭孤蓬轉萬里何超緬沈吟

卷道帙惻愴淚如霰入河討沈淪蹈海事游行傳書寄  
麻姑與爾期相見

冬日夷門旅懷

十日五日霧一冬半冬陰行子念歸旋朔風莽悲吟蒼  
蒼孟諸原慘慘杼秋林東望清淺流頗劇溟海心川陸  
曠超緬浩然煙水深百齡一何適萬化相推尋徒傳羽  
化迹不見鸞吹音清霜颯滿鏡紅顏倏頽侵邈彼五湖  
子賢哉吾所欽

行歌古澤中

古澤古雲遊帶索被羊裘川寒凍日白海暝孤雲愁  
鴉叫禿木鴻鴈遵方洲腸斷悲哉客黃河不斷流

其二

川原望不極愁思滿歸襟雲蔽長安目水流湘浦心  
頽陽減遠樹積雪明寒岑醉起海月照行歌入霧林

結客行席上贈洪生

翩翩紫騮馬燦燦雲花袍結客梁州市傾心贈寶刀  
意

氣凌朱亥英聲蓋伯高見說煙塵起橫行是爾曹

故人殷進士特使自壽張來兼致懷作僕離羣  
遠遁頗有遊陟之志酬美訂約遂有此寄

我生寡諧俗志與山林期謬擬渭川載豈羨荆山悲弱  
齡不解事走馬長安郊紫綬雖掛身丹丘阻逍遙心隨  
萬里雲舒卷何蕭蕭翩翩朱鳳凰飛集梧桐樹冠蓋交  
路衢青雲有捷步彈冠無鈍礪結交盡雄才殷君起東  
魯我使關西來揖鞭塵埃中朗如玉山開時從二三友

覽古黃金臺四序更代易人生豈常遇相如歸蜀都賈  
誼長沙去去去遊梁園耕釣孟諸數日月東西沒黃河  
落天走雲沙白皓皓萬里見海口雄劍掛土壁褐衣被  
兩肘朝從河上公暮逐墟中叟有時弄清漪明月在我  
手壽張三百里北望一何邇未移山陰棹先枉石川鯉  
剖鯉得素書故人今何如錦字偕華星照耀蓬蒿廬空  
谷激寒雷冬庭轉蘭芳曉起誦瑶音夜夢君之旁書中  
何所有相期陟東岳巉巖丈人峰彷彿几前落倏如佩

蒼龍倒景騎玄鶴願從東道主握手翔寥廓

紀夢

夜夢走西陸半天落金城天門兩壁開見之駭心情大  
江橫其西落日懸金盆日流江波湧霞彩照乾坤我問  
此何方云是湧金門揮手上雲樓邂逅錢世恩把袂凌  
天梯笑倒黃金樽袖出石室訣飲我金莖露人區香難  
託東指蓬萊路夢醒不見君空江暝煙霧

大霧翟左二子來訪

蒸煙暝萬古垂雲結樓臺白日墮空冥天地安在哉川  
嶽冰穹崇寒林條花開對酒不能飲擁褐心悲哀翟生  
雀羅喬左氏麟經才攀崧涉古陂訪戴臨河隈兩騎踏  
蒼茫宛如空中來日夕嚴飈興稍見歸鴉度雖開燕臺  
雲不辨焦橋路呼兒斲凍蕨然蒿寫秋露談玄析綿邈  
覽古悲沿泝停杯劃一笑茫然獨四顧

翟生苦節尚志人也邇從余河之上余嘉敬焉

作詩以贈



原子懸鶉衣仲蔚蓬蒿丘蒼煙卧木石浮雲傲王侯常  
懷一飯恩不顧千金酬絃歌空桑裏登嘯大岡頭眷念  
墟中約慙蔥河上遊我亦釣鰲者佳期杳滄洲

晉州留別州守及東鹿令用李白崔秋浦韻

荒原送行客白楊起西風雙鳬下雲漢五馬繫秋桐連  
城潯水上馳譽燕代中登高望雲海離思浩無窮

客過屬驟雨過

鳴雷不終夕急電偶來同城波靜綺席苑樹生長風雨

殘白日外虹垂青霧中為愛揚州客留連尊酒空

程生遊華山歸也誇我以絕觀動我以靈篇爰

贈此章抒我夙悵

君行值杪秋飄飄登雲巔笑弄石蓮花俯漱玉女泉秦  
時采松女有無嬉紫烟雙騎兩茅龍曾逢呼子先夜棲  
何峯室遇師叩何詮一虎嘯海月萬壑驚風旋颭然毛  
骨換錯落神光圓晨興扳長蘿朗詠青霞篇黃河衣帶  
去蓬萊瞪目前赤日跳扶桑仙掌發紅鮮伊予歎茲游

挂心三十年夢想落鴈頂携詩問青天  
林麓限層雲奮飛悵無緣安能振衣去共爾追群仙

懷湘曲

湘筠寒翠滿白日起秋雲美人杳何處  
江氣長氤氲手持紫玉管遙望青霞君  
藹藹波水暮何由致慇懃

獵雪曲

日光搖白雪黃雲片片裂狐裘誰家郎  
駿馬如電掣馳騁復徊排掉臂角方開  
一發中雙狸笑上梁王臺

其二

荒荒凍日白出門雪一尺爰爰道左兔意態一何適我  
弦纔一鳴不見彼行迹寄言遊獵人姑待春草碧

泂溪吟

濟川何必舟編竹便可涉秋風蘆白花洄沿水一葉淺  
之不用維渡深豈須楫黑潭有龍氣雲起腥風接

送藩幕張君入朝

騶馬向風嘶銀鞍翻玉蹄結裝紫薇下別我綠楊西記

室髮點漆叅軍髯過臍馮唐莫恨老神物不終泥

贈程生之南海

生為海南客幾度登羅浮天清衆島出萬水朝宗流  
乘桴聖者歎望洋遊子愁明珠與翡翠歲歲到神州

近竹吟

蕭蕭數竿竹每與寒歲期翠色酒中滿清風琴上吹  
疎值月來處密當雲起時萬動紛華裡一杯聊自持

水司陶君種桃柳成各有詩予和二首

沿堤萬萬樹一挿即成林五柳陶公意甘棠召伯心許  
我聽鶯去携壺就綠陰

其二

如何梁苑地忽見武陵津汎汎青霞水盈盈紅錦萼  
熟貧民食無兒許婦人

贈謝子

涼風吹海月當酒墮我懷愛此皎潔光願與君子偕攬  
之不入手仰面看昭回銀潢南北流竟夕但徘徊

其二

大河起長風挂席破黃濤問予今何之嶺海聊遊遨羅  
浮綠髮人思之我心忉幸君叩丹訣順風託鴻毛

相逢行贈袁永之

清晨客叩門投我一書札開緘錦雲爛鏗然玉相戛問  
客何方來新下黃金臺揚鞭指河洛迴旆陵高崖選珍  
掇琪草探美收瓊瑰路逢赤松子並舉收氛埃道同心  
乃冥神投誼難乖古人重良契豈必聲影偕行行報嘉

績貢此明堂材



空同集卷十六